

國朝耆獻類徵初編卷三百九十三目錄

孝友十九

錢伯垌

浦恆

洪永發

戈小蓮

徐守仁

龔良星

蔣雲安

黃崇階

朱有合

張應舉

鄒彝

范仲光

湯淵

江盛照

竹林矮子

陶雙喜

唐際華

劉攀龍欽浩生

管近德

陸士進

孝瞽孝啞兒

潘周岱

戴兆萃

樂太希

繆季

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

程永傳

國朝耆獻類徵初編卷三百九十三

通奉大夫前署江西巡撫江西布政使司布政使湘陰李桓輯

孝友十九

錢伯垌

君諱伯垌字魯思自號僕射山人曾祖安世南和縣知縣祖枝起
歲貢生工部營繕司行走父勳著國子監生母莊氏繼母高氏君
未成童卽孤露力學以至於有成敬幼聞君名後遊京師與張惠
言皋文交始見君之書若詩書學顏平原李北海詩學杜陵兼學
誠齋石湖有傳君捐館者張皋文曰魯思必不死何也魯思事繼
母孝今中歲未有子天豈使之長往傷孝子心哉已而果不死敬

再娶於高君之繼母爲敬妻之祖姑敬妻嘗言祖姑之來君扶輿
行祖姑下輿則執蓋隨之嚶嚶如孺子語常日坐臥抑搔之必得
喜語方止弟辛才感末疾君在吳中聞之一夕鬢髮盡白辛才卒
大慟曰吾何以慰吾母乎後莊太孺人以九十五卒君年逾七十
舉三子矣君性邁往多飲酒高步雄視知交徧天下不問賢不肖
皆交之然有爲非禮者未嘗與君從叔父文敏公維城享大名呼
吸可致人青雲君自少依之歉然自退終於國子監生嘉慶十七
年六月十七日卒年七十五娶莊氏無出于三山簡小晉又男側
室潘氏出銘曰

惇行其陳仲弓乎何氣之不可壓也隱節其梁伯鸞乎何與世之

狎也書人歟詩人歟何言之狹也

右墓誌銘惲敬撰

僕射山樵姓錢氏名伯垌字魯斯常州陽湖人國子監生以善書名天下稱曰魯斯先生先生生平所至京師山東湖南北浙江揚州宣歙之間書迹皆徧其處善爲詩好飲酒體貌魁梧瞻視不羣登望賦詩自謂一時豪士先生初至京師四庫書館方開天下寒畯競奔走求試謄錄期滿得以丞簿進身其族叔父文敏公欲爲之地一試不入格先生亦去不屑也先生書初學董文敏後學顏魯公旁及徐季海李北海諸大家旣沈浸數十年復歸之宋四家蔡蘇黃米其爲書若風雨驟至颯然有聲縱橫馳騖頃刻數十紙

放筆豪飲一坐盡暢朋舊親故貧而求飲者輒書與之唯所欲其不合者雖彊之不顧內行篤修多識前言往行事母夫人至孝年逾六十若嬰兒子然娶妻不育或勸置妾先生曰弟有子卽吾有子也何妾爲年及五十弟死其子亦皆死不得已置妾焉連舉三子山簡小晉又男先生年七十喪母夫人精力驟衰喪數畢亦卒所著僕射山莊詩若干卷藏於家

吳育曰余來常州見先生先生年六十矣視之若四十許人善談說酒後述百數十年事往往終日夜或未竟明日復之一字不遺惜乎無有能就而記之者今則已矣悲夫

右傳吳育撰

浦恆

國家設旌門之典以彰孝節之行苟有其人有司以聞朝奏夕報可用以式靡起懦意良厚也然節婦每歲下禮部者不下千人孝行數人而已蓋節有年例可據孝則自飭於無人之地非有奇節詭行足以震炫里閭人恆忽之而有司又慎重采訪不輕信也故舉之尤難然吾謂風俗之偷由於無所觀感無所觀感則獨行而寡和不自知其相率而入於浮薄也然則苟有其人尤當思以廣其傳非士君子居鄉之責與邑東北鄉曰福山鎮瀕海而俗獷悍浦氏獨柔愿至孝子尤恂恂如不勝衣家貧販於江北一夕心悸曰吾父殆病矣急航海颶風陡作檣帆摧折前舟俱覆榜人不知

所爲孝子自操舟徑渡父果病亟孝子事醫禱目不交睫者十晝
夜剗股進之竟獲瘳又數年乃卒孝子縛草墓側日負販養母夜
則宿草舍中值風雨嚴坐達旦人多憐之孝子弗顧也孝子年六
十餘每祭奉柩輿未嘗不泣下嫁其兩妹析家具三之曰女弟猶
弟耳方父病亟時鄰夜火旣延及矣孝子以身蔽父風猛甚火忽
越廬而過左右鄰蕩如而孝子家獨無恙孝子名恆字近倫
贊曰吾聞孝子父士瑜善事母數歲時侍母食日止粥一餐士瑜
食故緩所持實空器母察而憐之近倫之孝有自來矣荒江僻澁
禮義之教所不及浦氏父子人以販夫目之而已然一門之內獨
以孝行相繼謂無所觀感而然豈其然與

右傳孫原湘撰

君姓浦氏諱恆字近倫先世由汴京遷無錫再遷常熟明嘉靖間復自縣城遷福山則君之七世祖英也英生世德始入籍爲常熟人世德生驚殉倭寇之難驚生國甯國甯生秉臣秉臣生士瑜君父也自士瑜以上世有隱德韜光未耀士瑜娶劉氏生君君生而大母汪病篤士瑜服賈重洋劉氏抱以侍藥汪指而喜曰汝父母賢孝汝必能昌大門戶吾死無憾矣旣長代父庀家事父病割股以進母疾復割股父沒誓以身殉母諭之始止及母沒以頭觸棺血淋漓漬衰絰慟而絕絕而蘇日三四次而妻王氏竟以哭姑死君之孝能化其妻如此自父母沒後終身素服歲時祭祀必泣見

父母服物必泣聞者莫不感動撫兩妹自少以至於嫁友愛誠篤
其一當母劉病革時亦刲股和藥誠孝與君等君之孝又能化其
妹如此君嘗句當江北聞親病航海急歸遇風舟覆君獨以救得
無恙又嘗侍父疾鄰舍失火將及矣君呼天叩顙血流被地火越
其廬左右鄰皆燼而君室獨存其孝感又如此君以嘉慶十八年
卒年六十三越二年江蘇督學使者歸安王公以銜給額曰百行
首敦

論曰當浦驚殉倭難時一子尙幼宗祀不絕如綫妻葉氏守節撫
孤由福山西灣遷東灣家以昌大四傳至士瑜生三歲而孤家中
落其母汪鞠而教之嘗病起思粥士瑜煮米得一甌而自持空盞

侍母覺相抱以泣其至性皆有大過人者積德累行以至於君君敦本重倫好行其德竟以孝著聞閭里爲當道達官所褒美夫豈偶然哉夫豈偶然哉

右傳王家相撰

謝慈若夫豈斯落若

洪永發

嘉慶十八年冬平利生員洪昌璉來從余游聞余講洛閩之學獨欣然嚮往而天性沖和寡嗜慾慎言笑尤喜靜坐詢以小學朱子近思錄或問諸書則皆已卒業余心異之居一月忽日晡聞父病輒蒼黃徒步歸去父亦尋卒今聞余秩滿將去乃爲其父乞銘於余余重其人不忍辭按狀君諱永發字伯祥其先衡陽人乾隆九年曾祖諱乾遷居連水河遂占籍平利祖諱紹舜字仲康父諱元忠皆業農元忠生子四君居長少以目疾廢學而孝友剛介出於天性言行動與古合事親能養志嘗語家人曰人能移好貨財私妻子之心以愛其親未有不得父母歡者嘉慶二年遭父喪哀毀

骨立時值教匪之亂倉卒營葬一日夢父臥風雪中請地師覆驗
曰穴有蟻及啟視果然乃遷於白土關之東龍井一日復夢父臥
泥塗中覺而悔曰此必地師誤我也乃自購青烏經讀之足繭萬
山卒營壙於始祖墓側啟驗棺中果有水君之孝思與精魂相感
如此先是君伯諱元正綜理家事臨沒獨以屬君君之治家也歲
入雖豐曾不私一錢昆弟無閒言年四十始爲裘一領每歲時伏
臘家人讌集詳述先人流離播遷始置此田廬亟宜慎守恐子弟
易染浮薄戒以甯拙毋巧甯樸毋華每念艱難泣然流涕使子弟
耕讀各執一業朔望令耕者就塾聽講聖諭使明大義以三弟
永容天資粹美爲之擇師講業卒得補博士弟子員食廩餼有聲

庠序君居家以和不加人以聲色亦從不聞有詬諍者然閨門整肅雖至戚不得入閫內雖常言不使聞閫外嘗自書門聯云倫常以外無高達孝友之中卽治平蓋實錄也君樂道人善成人美而遇鄉黨不平事則正言不阿或以素好諷之君謝曰順理則好逆理則不好吾正以永吾好也嘗教子弟云人須是有幾分剛氣方能擔當得住若優柔不決終不濟事蓋其天性然也嘉慶十七年遭母喪哀毀如喪父時及葬穿壙先臥壙中一宿值天寒冰雪積尺餘自是鼻塞音啞逾年餘而逝屬纊時屬諸子喪祭宜守家禮毋用浮屠嗚呼洪君未嘗學問而跡其平生言行卓卓如此雖曰未學吾必謂之學矣君卒於嘉慶年月日年四十有九今年月日

將葬於石牛河之渠扒丫妻黎氏生子四伯某仲昌璉邑庠生叔
季某某皆業儒女二適某之孫某孫某銘曰

奕奕中皇滔滔連川靈鍾秀毓實產英賢何如不學而儒孝冠百
行可範可模剛毅天授冑堂冑構年甫知非云胡不壽佳城自卜
石牛之隩窀穸旣歸甯家保族

右墓誌銘葉世倬撰